

- प्रधानमंत्री नरेन्द्र मोदी काल बीकानेर ऊं विकास री 26 हजार करोड़ रुपया ऊं बत्ता खर्च वाळी केई परियोजनावां देश ने सूपेला-एक सौ ऊं बत्ता अमृत भारत रेल्वे टेशनां रो उद्घाटन करेला।
- ऑपरेशन सिंदूर रा तैत करी ज्यी कार्रवाई रे दौरान फौज रा काम अर हिम्मत रा मान मांय आज आज ई प्रदेश मांय तिरंगा रैलियां समेत केई कार्यक्रम राख्यी ज्या।
- मुख्यमंत्री भजनलाल शर्मा कह्यो-वां री सरकार समाज रा हर तबका रो भलो करणो तैय कीनो।
- राज्य मांय जबरी गर्मी अर लू रो दौर जारी-आतूणी हलकां मांय जिन्दगी माथे घणो असर पड़्यो।

000

प्रधानमंत्री नरेन्द्र मोदी रो काल बीकानेर जिला ऊं 26 हजार करोड़ रुपया ऊं बत्ता खर्च वाळी विकास री केई परियोजनावां देश ने समर्पित करण रो कार्यक्रम है। वे देश रा और बेहतर बणायी ज्या 103 अमृत रेलवे टेशनां रो उद्घाटन करेला। प्रदेश रा 8 टेशनां देशनोक, बूंदी, मांडलगढ़, गोविंदगढ़, गोगामेड़ी, मंडावर-महुआ रोड़, फतेहपुर शेखावाटी और राजगढ़ माथे अमृत भारत स्टेशन योजना रा तैत केई नुवा सुबीता मुहैया करायी ज्या है। कार्यक्रम रे दौरान श्री मोदी बीकानेर-मुंबई एक्सप्रेस रेल ने झंडी बता र रवाना करेला अर चुरू-सादुलपुर रेल लाइन री नींव रखेला। वे सूरतगढ़-फलौदी, फुलेरा-डेगाना, उदयपुर-हिम्मतनगर, फलौदी-जैसलमेर अर समदड़ी-बाड़मेर रेल लाइन ने बिजली ऊं चालण वाळी गाड़ियां लायक बणावण री परियोजनावां रो उद्घाटन ई करेला। श्री मोदी चार हजार 850 करोड़ रुपया ऊं बत्ता खर्च वाळी सात सड़क परियोजनावां ई जनता ने सूपेला। अक्षय ऊर्जा काम लेवण ने बधावो देवण सारू प्रधानमंत्री बीकानेर अर नावां मांय सूरज री रोशनी ऊं बिजली बणावण समेत न्यारी-न्यारी बिजली परियोजनावां रा काम री नींव रखेला। श्री मोदी राज्य सरकार री खास 25 परियोजनावां री नींव रखेला अर पूरा व्ह्या कामां रो उद्घाटन करेला। प्रधानमंत्री राज्य मांय स्वास्थ्य ऊं जुड़्या बुनियादी ढांचा ने और बेहतर बणावण री कड़ी मांय राजसमंद, प्रतापगढ़, भीलवाड़ा अर धौलपुर मांय नर्सिंग कॉलेजां रो ई उद्घाटन करेला। प्रधानमंत्री रो बीकानेर जिला रा पलाना मांय जनसभा ने संबोधित करण रो ई कार्यक्रम है। मुख्यमंत्री भजनलाल शर्मा ई आज बीकानेर पूग ग्या। प्रधानमंत्री री सभा री तैयारियां रो जायजो लेवण सारू आज मुख्य सचिव सुधांश पंत अर पुलिस महानिदेशक यू आर साहू सभा ठौड़ रो दौरा कर र अहलकारां ने जरूरी हुकम दीना।

000

प्रधानमंत्री नरेन्द्र मोदी कह्यो है के काल रो दिन भारत रा रेलवे ऊं जुड़्या बुनियादी ढांचा सारू ऐतिहासिक व्हेला। एक सोशल मीडिया पोस्ट रे जरिये श्री मोदी कह्यो के अमृत भारत टेशन सुबीता अर सम्पर्क ने बधावो देता थकां देश री बेहतरीन संस्कृति रो दरसाव करेला। मुख्यमंत्री भजनलाल शर्मा प्रधानमंत्री रा हाथां बीकानेर ऊं एक सौ ऊं बत्ता अमृत टेशनां रा उद्घाटन कार्यक्रम ने अभूतपूर्व बताता थकां श्री मोदी रो आभार जतायो।

वे सोशल मीडिया संदेश रे जरिये कह्यो के इण ऊं मुसाफिरां ने विश्व स्तर रा सुबीता मिलेला। मुख्यमंत्री कह्यो के आं टेशनां ऊं स्थानीय माली व्यवस्था तेज व्हेला अर नौकरी-धंधा रा नुवा मौका बनेला।

000

प्रधानमंत्री नरेन्द्र मोदी काल प्रदेश रा ज्यां आठ और बेहतर बणायी ज्या रेलवे टेशनां रो उद्घाटन करेला, वां मांय बीकानेर जिला रो देशनोक अर हनुमानगढ़ जिला रो गोगामेड़ी रेलवे टेशन ई भेळो है। अ दोन्यू टेशन आस्था अर धार्मिक पर्यटन री निजर ऊं ई खास है। और ब्यौरो म्हाणा प्रतिनिधि ऊं -

000

ऑपरेशन सिंदूर रा तैत करी ज्यी कार्रवाई रे दौरान भारत री फौज री हिम्मत री सराहवणा करता थकां आज ई प्रदेश मांय केई कार्यक्रम राख्यी ज्या। सवाईमाधोपुर मांय तिरंगा यात्रा निकाळी ज्यी, जिण रो न्यारा-न्यारा संगठनां री ओर ऊं फूलां री बरसात कर र स्वागत करी ज्यो। ई दौरान

देशभक्ति रा गीता सागे भारत माता री जय रा नारा लगायी ज्या। यात्रा मांय मोटी तादाद मांय पैली वाळा फौजी, एनसीसी कैडेट्स, स्काउट गाइड अर सामाजिक संगठनां रा नुमाइन्दा शामिल व्हा। श्रीगंगानगर मांय तेज गर्मी बीचे जोश सागे तिरंगा यात्रा निकाळी ज्यी, जिण मांय बुजुर्गा अर पैली वाळा फौजियां सागे मोटी तादाद मांय जनता ई सिरकत कीनी। झुंझुनूं मांय भारतीय जनता पार्टी री ओर ऊं न्यारा-न्यारा सामाजिक संगठनां सागे मिल र तिरंगा यात्रा निकाळी ज्यी। खास बाजारां ऊं व्हेती थकी शहीद स्मारक पूगी ई यात्रा मांय पांच सौ फीट लम्बा तिरंगा झण्डा माथे सगळां रो खास ध्यान रह्यो। ऑपरेशन सिंदूर री कामयाबी पाछे आकाशवाणी जयपुर रा समाचार सुणबा वाळा ई वां री खुशी जता रह्या है। बाड़मेर रा हीरा राम सारण ऑपरेशन सिंदूर री सफलता अर भारत री फौज रा पराक्रम ने नमन कीनो है।

देश ने मोकळा फौजी देवण वाळा झुंझुनूं जिला रा पैली वाळा फौजी कर्नल शौकत अली ऑपरेशन सिंदूर ने अभूतपूर्व बताता थकां बधाई दीनी अर वां री जूनी यादां बतायी।

000

मुख्यमंत्री भजनलाल शर्मा कह्यो है के वां री सरकार महिलावां, गरीबां, नौजवानां अर किसानां समेत समाज रा हर तबका रो भलो करणो तैय कीनो है। वे आज जयपुर मांय राख्यी ज्या एक सामाजिक कार्यक्रम मांय बोल रह्या हा। मुख्यमंत्री कह्यो के मोदी सरकार देश रा हर तबका अर जाति री बरकत सारु काम कर रही है। कार्यक्रम मांय मुख्यमंत्री नौजवानां ऊं संत जीवाराम, संत आत्माराम अर बाबा साहेब अम्बेडकर ने याद करता थकां आं महापुरुषां री जिन्दगी ऊं सीख लेवण बाबत् कह्यो। ई दौरान मुख्यमंत्री समाजिक बराबरी रा काम मांय खास भूमिका निभावण वाळा 'संत आत्माराम लक्ष्य' रो पैनोरमा बणावण रो ऐलाण ई कीनो।

000

प्रदेश मांय जबरी गर्मी पड़ रही है अर लू बाज रही है। राज्य रा पाकिस्तान ऊं लागता आतूणी हलकां मांय लू अर लगातार चढ़ता पारा ऊं परेशानी महसूस व्हे रही है। म्हाणा श्रीगंगानगर खबरनवीस बतायो के वटे पड़ रही ज़ोरदार गर्मी ऊं हाल बेहाल व्हे रह्यो है।

मौसम विभाग रे मुजब आज बीकानेर, जोधपुर, जयपुर अर भरतपुर संभाग रा कुछ हलकां मांय ई उन्नो बायरो बाजण रा आसार है। ई सागे ई श्रीगंगानगर, हनुमानगढ़, चूरू अर झुंझुनूं जिलां मांय कठे-कठे लू बाजण अर रात री बगत ई तेज गर्मी सारु चेतायी ज्यो है। मौसम महकमो तीन दिन ताई बीकानेर संभाग अर शेखावाटी हलका रा कुछ हिस्सां मांय ई पारो 45 ऊं 48 डिग्री सेल्सियस बीचे रेहवण अर लू बाजण री संभावना जतायी है। सरहदी हलकां मांय धूळो उड़बा सागे ज़ोरदार बायरो बाजण सारु चेतायी ज्यो है।

उदयपुर अर कोटा संभाग रा कुछ हलकां मांय आवता 4-5 दिन दोपहरां पाछे बादळां री गाज सागे बिरखा व्हेवण अर आंधी चालण रा आसार है।

000

पैली वाळा प्रधानमंत्री राजीव गांधी री पुण्य तिथि रे मौके आज आतंकवाद विरोधी दिवस मनायी ज्यो। ई मौके जोधपुर मांय केन्द्रीय संचार ब्यूरो री ओर ऊं राजकीय महिला आईटीआई मांय विचार गोष्ठी राख्यी ज्यी। इण मांय ऑपरेशन सिंदूर अर हाल रा वाकयां रा बारा मांय विचार जतायी ज्या। ई मौके आतंकवाद रे खिलाफ चित्रकला अर सवाल-जवाब री होड़ ई राख्यी ज्यी।

000